



Neix Couh Dwg Gou

这就是我

Daihgya ndei! Gou dwg dahniq simvuen lingzlaeux dwggyaez ndeu, aen naj luenzlulu, lwgda mbouj hung cix gig mizsaenz. Gij gou ceiq daekeiq haenx couh dwg byoemgyaeuj gou lo, byoem gou youh co youh raez, ndaemndwt ronghlwenq, lumj caeuzndaem nei. Gou gig gyaez riu, mboujgvaq mwh daej couh mbouj dwggyaez gejlai lo.

Gou miz aen loqsiengj ndeu, couh dwg dang boux denhvwnzyozgyah ndeu. Vih neix, gou lumj hozhawq dungxiek nei, bae doeg sojmiz saw gohbuq gvendaengz yijcou fuengmienh henz ndang gou haenx. Gyanghwnz seizhah, gou cungj gyaez buen aen eij he daengz yanghongh, naengh gwnzde yawj

ndaundeiq gwnzmbwn. Gwnzmbwn gvangqhumhum neix bu rim ndaundeiq, lumj cuenqsig nei rongh-migmig, youh lumj aenaen najriu nei, cingq heuh gou byaij gyawj gyoengqde, bae dingq gij mimiz gyoengqde. Ngiengx gyaeuj yawj ndaundeiq gwnzmbwn, baenz aen baenz aen vwndiz ngeizvaeg youq ndawsim gou nyoenxdoengh, ndaw yijcou miz baenzlai singhhi caengz rox, doenghgiu singhgiuz gwnzde miz vunz lwi? Danghnaeuz miz gyoengqde gwn gijmaz? Yienghde maj ndaej baenzlawz yiengh? Gangj gijmaz vah ne? Gou roengz gietsim, majhung le itdingh bae damqra, fatyienh gyoengqde, geij ok gij maez caengz geij ok haenx.

Gou gyaez guh hauilai doxgaiq, ceiq gyaez dwg lienh sij suhfaz. Gaxgonq gou doiq lienh sij cih di ndeu cungj mbouj yinx, baez naengh couh naengh baenz byonghngoengz, sij ndaej fwngz naet bae, miz maz ndei lo? Hoeng riengz dwk cih gou sij haenx ngoenz beij ngoenz ndeiawj, gou gamjsouh daengz

lienx cih daiq hawj gou bienqvaq gig hung. Seizneix mbouj yungh daxmeh coi, gou moix ngoenz cungj gag cawjdoengh lienx suhfaz buenq diemj cung doxhwnj bw!

Gij vaihcawq ceiq hung gou couh dwg geiq gyaeuj lumz rieng, hwnj sam nienzgaep lo, daehsaw lij sousib mbouj ndei, mbouj dwg laeuh yienghneix couh dwg laeuh yienghhaenx. Laeuh gobwnj, vunz ndaw ranz deng soengq daengz hagdangz hawj gou; laeuh bit, gou deng ciq doengzhag yungh; hoeng baezgonq gou lumz cozyez youq ndaw bouqgnw-haeux, danghnaeuz mbouj dwg lauxbanj simndei bang gou sou hwnjdaej, cengdi couh nguh saeh lo.

Daxmeh cungj daezsingj gou nyinhcaen di, sijsaeq di. Gou seizneix cingq roengzrengz gaij gij vaihcawq geiq gyaeuj lumz rieng gou bae. Gou siengsaengq gou itdingh guh ndaej daengz! Gayouyz!

(Denhcinh Si Suigingj Siujyoz sam nienz-gaep Cangh Cinhoz)

Gyanghaet Ranz Yahdaiq

外婆家的早晨

Gou ceiq gyaez youq ranz yahdaiq youq. Gyanghaet mwh gou lij youq ndaw denz loq fangzhwnz, couh dingqnyi doufaex “bung-bang” yiengj sing ndeu, gou hai da baez yawj, laxlawz dwg duz mabwnyungz caeuj duz ma’ndaem! Song duzde baez haeuj rug daeuj, couh gvaengz aen mbonq gou cienq bae cienq dauq, yaep ndeu yawj gou, yaep ndeu youh boemz youq gwnz haiz gou vax geij mbat. Mbouj dwg hwnz ndeu mbouj raen, song duz ma neix couh siengj gou luba?

Gou ganjip hwnqdaej daenj buh, caeuj song duz ma buet ok bakdou bae. Daengngoengz lij caengz loh aen naj de okdaej, gaeqboux hung gaenq hainduj guhhong lo, gyoengqde miz mbangj ndwn youq gwnz rin hung, miz mbangj ndwn youq gwnz goenqfaex, miz mbangj cienmonz mbin hwnj gwnz nyaqmeg sangswd bae, enjaek ngiengxgyaeuj ndiengqrieng, hemq “o o o” coh yangmbwn, gij sing de goksadsad. Duz gaeqboux he daekeiq lai, nyex gij gaeqboux wnq doxcaez bae dot de, duz ak ndeu nanz dingj gyoengq gaeq ndeu, de cijndei yenjakyak deuzbae lo. Duz gaeqboux ndeu roxnyinh gou najseng, gingqyienz mbin gvaqdaej dot caekhaex gou, gou diem din baez dik, de deng hwk ndaej deuz lo.

Duz bit caeuj duz hanq hix daeuj lo, gyoengqde hemq “ab’ab”, youq ndaw hongh buetlulu. Sawqmwh, duz hanqboux hung ndeu iet aen hoz raez de, dep dei hix vaiqviet coemj coh gou, hwk dwk gou hemq yahdaiq gouqmingh.

Gwnz dieg gaeq bit hanq neix hwnj haenx roengz ciengq dwk go, roeggacak gwnz faex hix mbouj fug saw, “cica cica” hemq, gyoengqde hemq sam sing dingz mbat ndeu, gig miz cezcou ne! Baenz gyoengq baenz bang roeglaej ndwn youq gwnz faex doeng yawjyawj sae yawjyawj, deq miz seizgei couh mbin

roengzdaej ciengj gijgwn gaeq bit hanq.

Ndaw mbanj ranzranz hoenzfeiz hwnj-neuneu. Yahdaiq itdingh cawj ndei gyaeqgaeq gyaeqbit caj gou ma gwn lo!

(Hoznanz Swngj Nanzyangz Si Youz-denz Daihhaj Siujyoz sam nienzgaep Bangz Bozcwngz)



Byagim Gig Siengj Ndaeidaengz Vunz Haenh Haenx

很想得到赞美的金鱼



Youq ndaw aen gangbya ndeu, ciengx miz duz byagim gyaeundeit ndeu. Mwngz yawj, duz byagim saekraiz henj hau doxgek, gwnz ndang daenj geu vunjhau, gwnz hoz cug diuz gaenhoz henjnding ndeu, gyaeundeit raixcaix.

Byagim ceiq maij ciuq gingq. De gag nyinhnaeuz de dwg duz bya lajbiengz ceiq gyaeundeit ndeu, hoeng, gangj daeuj hix geizgvaig, de soqlaiz mbouj ndaej vunz haenh gvaq, coenz he hix mbouj miz. De gig siengsim, nyinhnaeuz bouxwnq mbouj rox ngonzyawj gij gyaeundeit de.

Miz ngoenz ndeu, byagim youh dawz gingq daeuj ciuq, sawqmwh, daj rog gang cienz daeuj coenz vah de gyaez dingq ndeu: “Ya, byagim gejlai gyaeundeit ha!”

Byagim ngiengx gyaeuj yawj, laxlawz dwg duz meuz iq ndeu haenh de. Byagim gig gamjdoengh, cungj yaek daej lo, ganjvaiq naeuz: “Gyo’mbaiq mwngz, meuz iq!”

Meuz iq bibi fwngz, naeuz: “Mbouj yungh gyo-mbaiq, mwngz caen dwg gig gyaeundeit. Danghnaeuz mwngz yat ok naj raemx, yienghneix couh engqgya gyaeundeit lo.”

Byagim dingq vah duz meuz le, sikhaek yungh rengz daengx ndang, lumj byajmig nei yat ok gang daeuj.

Sawqmwh, aen bak hung ndeu haeb dawz aen ndang gyaeundeit de, byagim laulili byaengq aen da de, yawjraen le mumh henz bak duz meuz.

Byagim daengz mwh dai mbat de cij rox, cienfanh mbouj ndaej cij dingq bouxwnq haenh cix lawq “fagmid” ndaw fwngz de.

(Cungzging Si Liengzbingz Yen Sizyen Siujyoz it nienzgaep Yangz Hanz)